

4. maj 2015

Nunat Avannarliit Killiit Siunnersuisoqatigiiffiata kaammattuutitut aalajangersagaata Inatsisartunit ilalernerqarneranik Inatsisartut aalajangiiffigisassaattut siunnersuut: Nunat Avannarliit Killiit Siunnersuisoqatigiiffiata Savalimmiuni naalakkersuisut, Kalaallit Nunaanni Naalakkersuisut Islandimilu naalakkersuisut kaammattorpaat suliniutit umiarsuit atorlugit angallannermi svovlimik aniatitsinermik annikillisitsisinnaasut eqqarsaatigalugit suleqatigeeqqullugit. Nunat kaammattorneqarput ikummatissat mingutsitsinnginnerusut, taamatullu aamma atortut avataasiorluni aalisarnermi imaatigullu assartuinnermi angallatit ingerlataasa pujuliornerinit svovlimik paaasinnaasut atorneqarnissaannik piumasaqarnikkut sunniuteqartumik avatangiisinullu mianersuussisumik nukissiuutinik atuinermut periutsinik ineriartortitsineq atuutsitsilernerlu pillugit suleqatigeeqqullugit.

(Aallartitat siulittaasuat Lars Emil Johansen)

Nunat Avannarliit Killiit Siunnersuisoqatigiiffiata siorna 2014-imi septemberip qaammataani ukiumoortumik Islandimi ataatsimiinnerani ilaatigut aalajangerneqarpoq Savalimmiuni, Islandimi kiisalu Kalaallit Nunaanni Naalakkersuisut kaammattorneqassasut suliniutit umiarsuit atorlugit angallannermi svovlimik aniatitsinerit annikillisinniarlugit suliniuteqaqqullugit.

Aalajangiiffigisassatut siunnersuutip tunngavilersorneqarnerani erseqqissaassutigineqarpoq sumiiffiit sinerissani inoqarfeqartut mingutsitsinermik eqqugaasartut, taamaattumik mingutsitsinerup annikillisarneqarnissaanik suliniutit Nunat Avannarliit Killiit akornanni siunissami pitsaanagerusumik siuarsarneqarnissaat Siumumiit tamakkiisumik tapersorsorparput. Siumumiimmi Kalaallit Nunaata imartaata sineriaatalu pitsaasumik avatangiisitigut atugassaqartinneqarnissaat kisiisa pinngikkaluarlugit nunat sanilerisagut peqatigalugit imartatsinni angallannikkut annertusiartuinnartukkut pitsaasumik avatangiisinut atugassaqartitsinissap timitalerneqariartuarnissaa pingaaruteqartutut isumaqarfigaarput.

Siumumiit aalajangiiffigisassatut siunnersuutip massumap nunani avannarlerni killerni nunat sineriallit mingutsitsinerup annikillisarneqarnissaanut qanoq peqataasinnaanerunissaannik angunia-gaqarneq tamakkiisumik taperseratsigut oqaatigissavarput.

Nunat Avannarliit Killiit akornanni mingutsitsinerup taassuma annikillisarneqarnissaanut suleqatigiissutigineqarsinnaasutut taakkartorneqartut Siumumiit soqutiginartikkatsigik matumani oqaatigissavarput, periarfissallu taakkua arlaliusut qanoq nunanut taakkununga pitsaanerusumik sunniuteqarsinnaanerit suleqatigiissutigissallugit tunngavissaqqissutut taaneqarsinnaallutik.

Naalackersuisuniit Kalaallit Nunaata imartaanut immami avatangiisinut inatsimmut siunnersuummik nutaamik 2016-imi saqqummiussinissaq siunertarineqarmat Siumumiit maluginiarparput, tamannalu mingutsitsisinnaanerup annikillisarneqarnissaanut pitsaaliuinerillu annertusarneqarnissaannut sinaakkusiissussaana qularutissaanngilaq.

Nunat Avannarliit Killiit Siunnersuisoqatigiiffiata matumani nunani avannarlerni killerni Naalackersuisut kaammattorneqarnissaat, tassalu umiarsuit atorlugit angallannermi svovlimik aniatitsinerup annikillisarneqarnissaanik suliniutinik aallartitsinissaat Siumumiit taperseratsigu naggataatigut oqaatigissavarput.

Taamatut oqaaseqarluta kaammattuut Siumumiit taperserparput.

Anders Olsen,

Siumut